

Booshi Wever ta revela:

E berdad a alcansa e mentiranan di Dr. Posner tocante A.H.I.

ORANJESTAD (AAN): Segun Parlamentario drs. Booshi Wever di MEP, recientemente el a ricibi e raport di inspeccion di Salubridad Publico hulandes tocante e fayecimiento di un senora despues cu a worde haci un cateterisacion na Aruba Heart Institute (AHI). E raport aki claramente a indica:

- Negligencia di parti di e cardiologo cu a atende e senora (C. Lacle),
- Falta di cumplimento cu e normanan medico pa ejerce e procedura di cateterisacion,
- E falta di un acuerdo formal entre AHI y Horacio O. Hospital (HOH).

Ponencia di MEP den pasado riba e topico di cateterisacion.

Nos partido desde un principio a denuncia henter e asunto di cateterisacion den AHI den e setting actual y nos a indica e rol dudoso cu nos minister di salubridad publico a hunga den esaki. Cuesta loque cuesta e proyecto aki mester a worde realisa, sin cu a tene cuenta cu e conseho- y condicionnan cu instancianan renombra internacionalmente a recomenda.

MEP a muestra e falta di seriedad y di experiencia riba e materia aki. Nos a indica cu lo ta duele cu lo mester bay actua despues cu e baca hoga, den e caso aki algo sumamente serio manera bida di un ser humano.

Nos a indica tambe e hecho cu negoshi lo bay worde haci (e cardiologo ta cobra 8 biaha mas hopi cu un cardiologo na Hulanda), y alabes nos a indica riba e conflicto di interes.

Raport di Hoofdingspectie voor de Gezondheidszorg di Hulanda. E señora en cuestion tabata un patient di alto riesgo segun e reglanan estabeci (Diabetico y bypass den pasado).

E raport ta indica cu e senora mester a bay Houston inmediatamente y nunca mester a worde cateterisa na Aruba.

E raportahe prome y despues di e procedura tabata minimo y deficiente. E cuidio posterior na e procedura tabata desastroso di parti di e cardiologo. Mi ta cita parti di e raport: 'Met de geringe signalen die er waren had zorgvuldiger dienen te worden omgesprongen; de arts is in deze tekort geschoten'.

Mas leu nan ta remarca: 'Bevindingen bij de hartcatheterisatie, het bloedverlies, de bloeddrukdalingen: patiente verkeerde reeds toen in een onvoldoende onderkende zorgelijke situatie'.

E inspectornan a bisa cu palabranan cla cu e cardiologo mester a bin hospital y no duna instruccion ironeo via telefoon.

E raport ta indica tambe cu verslaglegging di e cardiologo, contrario na esun di e enfermeronan, tabata malisimo.

Na final e raport ta indica cu e cardiologo no a reconoce e seriedad di e caso; e paciente entre otro a fayese a consecuencia di un ataque di corazon cu e cardiologo no a reconoce.

E cardiologo tin e pudor di desmenti e hecho cu e enfermeronan a duna tur e informacionnan valioso cu posiblemente lo por a haci e resultado final un menos desastroso.

Un negligencia total di tur reglanan stipula dor di e cardiologo y su team.

Esaki ta e miedo cu nos partido a trese padilanti riba e maneho di e individuonan aki.

Ponencia di dr. Posner: Segun drs. Wever, den un entrevista na television, despues cu mi denuncia e desaster menciona, dr. Posner (cu ta forma parti di e team) kier yena nos wowo cu santo atrobe. E a atakami personalmente, esei mi ta lague pa su cuenta, pero ta admiti cu erornan a worde cometi.

E tin e curashi di bisa cu awor si cambianan, manera publica

den e raport lo worde estableci. Mi ta duda cu esei lo por ta un consuelo pa e famia.

E minister ta lubida di menciona cu e kier a hinca e raport aki den doofpot y cu deliberadamente e la engana e organo mas halto di nos pais cu e ta e parlamento di Aruba.

Es mas e minister tin duda grandi den e conocimiento di e pueblo di Aruba dor di bisa cu ta e a manda haci e investigacion.

E minister ta lubida cu ningun di su argumentonan fofo aki lo por sconde e berdad amargo. Loque e minister ta compronde, bow di adelanto medico, mas bien ta muestra ariba libertinahe, falta di respet pa bida humano y negligencia di parti di Salubridad Publico (unda inspectie di Aruba y Ministerio Publico a keda?).

Segun drs. Wever, Partido MEP a indica den pasado ariba e conflicto di interes di e minister en cuestion: "Minister-medico-comerciante".

Con bo por confia un minister cu a malinforma pueblo di Aruba y tabata partcipe como medico den un acto cu a costa bida di un ser humano.

Tristo den henter e asunto aki

ta cu un ser humano mester a MURI prome cu a trece e cambionan y ningun hende ta carga e consecucionan. E medico cu a ser adverti a get away (e Ministro ta su amigo, Ministerio Publico ta drumi y Inspectie ta sinta man cruza, miedo??), e Minister ta hana apoyo di AVP/OLA y e ta keda Minister manera nada a pasa. Den mi opinion tanto dr. Lacle como dr. Posner a haci nan mes culpabel na un acto criminal pa motibo cu deliberadamente a negligencia advertencianan y guidelines reconocidos y vigente mundialmente, cu tabatin como consecuencia cu un ser humano a muri. Y si pa bo culpa of pa motibo cu bo no a haci nada pa stroba un fayecimiento di un hende, bo ta mes of mas culpabel pa e morto di e persona aki.

Y awe tin un famia cu no tin nan mama meymey di nan pa simpel motibo cu dos (2) medico, cu ta hambra pa placa y pa motibo cu nan no kier tende. (un di nan ya caba a yega di hana un "officiele berisping" pa un of otro negoshi di remedi).

Arubianonan no por sigui di ta "proefkonijn" pa e hendenan aki, sr. Posner mester saca su conclusion, Ministerio Publico mester haci nan trabow pa evita cu den futuro otronan por haci nan mes culpabel na tipo di actonan criminal asina ey y get away cu esaki tambe.

drs. Wever a finaliza, indicando cu ta pa e motibonan aki tambe MEP lo pidi un reunion riba e topico aki pa asina ey trata na convence nos coleganan di e seriedad di e asunto aki.

TA HUUR CAS
Waterfront na Spaans Lagoenweg.
Fr. Porch, Sala, 3 Camber 1 Baño, etc.
Afl.1.500,= p/l.
Market Scan. Tel: 832255

TSUNAMI CRIYOYO!!

